

Pillimona

¹ Yesusi Kirstossa gish qachettida tappe Phawullossapenne nu isha Xiintossape nu siqqo isha gididi nunara issife oothiza Pllimonas. ² Ne keeththan shiiqqiza ammaniza asasinne nu michchiyo Ampibyas qassekka nunara issife Kirstossa wotadara gidida Arkiiphasses; ³ Nu Aawa Xoossafe nu Goda Yesusi Kiristossape keeyatethinne sarotethi intes gido.

Pillimona siqqonne ammano.

⁴ Ta ta wossan nena qopashe wuriso wode Xoossa galatayss. ⁵ Gaasoykka ne Xoossa asa siqizaysanne Goda Yesusi Kiristossan ne ammanizaysa ta siyadis. ⁶ Nuni Kiristossas gididaysanne nuus diza loo7o yoy wuri qonccen eretana mala nekka ne ammano hara asas bessana mala ta nees miina wossayss. ⁷ Ta ishazo! ne hanon Xoossa asa wozinay ooraxxida gish ne siiqqoy ta wozina keehi miinisides.

Anasimossay piilmonakko siimana mala Phawulosay wossides.

⁸ Hessa gish ne oothanas besizayssa oothana mala nena azazanas taas Kirstosan xalateth deesikkoshin. ⁹ Gido attin ta nena azazanape siqora wossayss. Gaasoykka tani Yesusi Kiristosa gish qachistada qasho keeththan diza phawulosakko. ¹⁰ Ta nena wossizay ta qasho keeththan dashe Yesusi Kirstosan yeellida na Anasimossa gishaskko. ¹¹ Anasmossay hayssafe kasse nena

go7iibeyna shin ha7i gidiko nenakka tanakka go7izadekko. * 12 Ta ha7i iza neekko zara yedadis. Ta neekko yedizay iza gidontta ta wozina neekko zara yediza mala qoodayss. 13 Mishiracho qaala gaasotetha ta haan qachista dishin ne tana ootha maadana exxa izi tanara deyidakko tana ufaysses shin. 14 Gido attin ne loo7o oothoy ne dosanipe attin wolliqara gidonta mala gaada nena ooychonta aykokka oothana koyabeykke. 15 Anasmosay hano gakanaas neppe gutha wode shaketikokka oone erizay hayssafe guye wuriso wode nenara daana dandda7ees. 16 Hayssafe guye izi nenara aanay ayye mala gidontta ayyefe adhidi nees asho isha mala gidana. Izi taas dosetida ishakko. Gido attin izi nena oothi go7ana asi gidida gishinne izi nees Kirstossa baggara isha gidida gish nees keehi dosetidade gidana. 17 Nuus diza isipetetha gaason ne tana nees isha mala qoodiza giidikko tana ne mokka ekiiza mala izakka mokka ekka. 18 Izi ne bolla gathida qohoy dikko woykko ne accoy iza bolla dikko iza accoza ta bolla tayba. 19 Heko ta Pawulossay “Iza accoza ta nees qanxana” gaada ta kushera xafadis. Gidikokka ne Kiristossa ammaniday ta baggara gidida gish haray attoshin nekka taas qanxana accoy dizade gididayssa ta nena erissanas koshena. 20 Hi7a ta ishazo heesa loo7o ootho ne taas oothana mala Goda sunthan Kirstossa gish gaada ne ta wozina shempisana mala nena wossayss. 21 Ta nees hayssa xahaaththaiday ne taas azazistanaysa

* **1:11** 1.11 Anasmosay gussi Girikke qalan go7izade gusa.

ammanadako. Ta nena ooychidayssafe ne aatha oothonayssa ta erayss. ²² Xoossi inte wossa siydi ta inteko yanadan oothana mala taas ufayssi diza gish ta baada intekon shempanaso taas hayana giigissa.

Wurithetha saroseth

²³ Yesusi Kiristossa gaason tanara qachet-tida Ephafiray nena saro gees. ²⁴ Hesathokka tanara oothizayti Marqqosay Aristirokosay Demassaynne Luqassay nena saro geettes. ²⁵ Goda Yesusi Kistossa kiiyatethi intenara gido.

Gamo Geesha Maxxafa New Testament
The New Testament in the Gamo language of
Ethiopia: Gamo Geesha Maxxafa New Testament

copyright © 2017 The Word for the World International

Language: Gamotso

Contributor: The Word for the World Ethiopia

Gamo Geesha Maxxafa New Testament

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-04-08

PDF generated using Haiola and XeLaTeX on 21 Feb 2024 from source files dated 9 Apr 2023

67a804de-b81d-5cd7-ab9c-f723c8f46f78